

Uunga siunnersuut: Inissianik attartortitsisarneq pillugu Inatsisartut peqqussutaata allanngortinneqarnissaa pillugu Inatsisartut inatsisaat nr. xx, xx. xxx 2019-imeersoq (Pisortat inissiaataanni uumasuuteqarnissamut tunngatillugu maleruagassat allanngortinneqarnerat aamma attartortup toqukkut qimagunnerani il.il. attartukkap tiguneqartarnera pillugu)

§ 1

Inissianik attartortitsisarneq pillugu Inatsisartut peqqussutaat nr. 2, 12. maj 2005-imeersumi, Inatsisartut peqqussutaanni nr. 14, 20. november 2006-imeersumi, Inatsisartut peqqussutaanni nr. 9, 5. december 2008-imeersumi aamma Inatsisartut inatsisaanni nr. 17, 8. juni 2017-imeersumi, makkua allanngortinneqassapput:

1. § 37, *imm. 5-imi*, ”§ 50, *imm. 5*” allanngortinneqarpoq imatut: ”§ 50, *imm. 7*”.

2. § 50, *imm. 3-5*, atorunnaarsinneqarput, tamatumunngalu taarsiullugu *imm. 3-7-iut* ilanngunneqassapput:

” *Imm. 3.* Namminersorlutik Oqartussat aamma kommunit inissiaataanni attartortittakkani uumasuuteqarnissaq akuerisaavoq, taamaattoq takukkit *imm. 4-7*.

Imm. 4. *Imm. 3* apeqqutaatinagu, taamaattoq najugaqatigiiffimmi pineqartumi uumasuuteqarneq akuerisaassanngitsoq, najugaqatigiiffimmi siulersuisut aalajangersinnaapput.

Imm. 5. Ilanngussaq 4 naapertorlugu uumasuuteqarneq pillugu torersaarnissamut maleruagassani piunasaqaatit sukkulluunniit naammassineqarsimassapput.

Imm. 6. Uumasuuteqalernermi attartortoq qaammatini pingasuni ineqarnermut akiliutip annertoqqataanik immikkut qularnaveeqqusiissaaq. Attartortup uumasuuteqalernermi qularnaveeqqusiussassaq attartortitsisumut aningaasanngorlugu akilissavaa. Uumasuutigineqartoq toquppat imaluunniit attartortoq allatut uumasuuteqarunnaarpat, attartortitsisoq illuutip attartorneqartup misissoreernerani aalajangersinnaavoq, attartortup qularnaveeqqusiussaasa uninngatinnissaannut piunasaqaatit atuukkunnaassasut aammalu aningaasat tamakkiisumik ilaannaasumilluunniit utertillugit tunniullugit.

Imm. 7. *Imm. 6-imi* qularnaveeqqusiussatut akiliutigineqartut, ajoqusiinernut uumasuuteqarnermit pilersinneqartunut matussutissatut, attartortitsisup atorsinnaavai.”

3. § 60 imatut oqaasertalerneqarpoq:

” § 60. Attartortup toqunerani katissimallugu aapparisaq imaluunniit aappaasutut nalunaarsorsimasoq maannamut atugassarititaasut tunngavigalugit attartortunngornissamut pisinnaatitaavoq, taamaattoq takuuk § 63, *imm. 3*. Piunasaqaataavoq katissimallugu aapparisaq imaluunniit aappaasutut nalunaarsorsimasoq, attartortup toqunissaa minnerpaamik qaammatinik arfinilinnik sioqqullugu attartortup inoqutaanni ataatsimut illoqataasimassasoq aammalu inuit allattorsimaffianni nalunaarsorsimassasoq.

Imm. 2. Imm. 1 taamaaqataanik attartortup inooqataanut atuuppoq. Inooqataasutut isigineqarpoq inuk attartortup katissimalluni aappariinnut assingusumik inooqatigisaa.

Imm. 3. Imm. 1 taamaaqataanik attartortup meeraannut 18-it sinnerlugit ukiulinnut atuuppoq. Meeraq illoqarfimmi allami ilinniarnerninik naammassereernermini imaluunniit unitsitsereernermini ingerlaannaq attartukkami inuit allattorsimaffianni nalunaarsorsimalersimappat, ilinniariarsimaneq imm. 1 malillugu naatsorsuinermini ilanngunneqassaaq. Meeqqat angerlarsimaffimmi najugaqartut arlallit attartortunngornissamik kissaateqarpata, meeraq attartortup toqunissaa sioqqullugu piffissami sivisunerpaami attartortup inoqutaani ataatsimut illoqataasimasooq aamma inuit allattorsimaffiani nalunaarsorsimasooq, salliutinneqassaaq.

Imm. 4. Imm. 1 taamaaqataanik attartortup angajoqqaavinut atuutissaaq. Angajoqqaat marluullutik attartortunngornissaaq kissaatigippassuk, angajoqqaq attartortup toqunissaa sioqqullugu piffissami sivisunerpaami attartortup inoqutaani ataatsimut illoqataasimasooq aamma inuit allattorsimaffiani nalunaarsorsimasooq, salliutinneqassaaq.

Imm. 5. Sulisunut inissiaq tassani pineqarpat, attortortumut pisortani sulisitsisuni atorfeqarnera aqcutigalugu innersuunneqarsimasooq, attartortup katissimallugu aapparisa, aappaasutut nalunaarsorsimasooq, meeqqat 18-it sinnerlugit ukiullit imaluunniit angajoqqaat attartornermut atugassarititaasut nalinginnaasut tunngavigalugit inissiamut innersuunneqarnissamut pisinnaatitaapput, taamaattoq takuuk § 63, imm. 2-3. Innersuussinissamut piumasaqaataavoq attartortup katissimallugu aapparisa, aappaatut nalunaarsorsimasooq, meeraq 18-it sinnerlugit ukiullit imaluunniit angajoqqaavi nammineerlutik pisortani sulisitsisumi atorfeqarnertik aqcutigalugu sulisunut inissiamut innersuunneqarnissamut pisinnaatitaassanngitsut

Imm. 6. Attartortoq ukioqqortussutsini imaluunniit napparsimanini pissutigalugu utoqqaat illuannut assigisaanulluunniit nuuppat, imm. 1-5-imi aalajangersakkat taamaaqataanik atuutissapput.

Imm. 7. Imm. 1-4 malillugit attartukkamik tigusinissamut pisinnaatitaaneq, attartortup katissimallugu aapparisaanut, aappaatut nalunaarsorsimasumut, meeqqanut angerlarsimaffimmi najugaqartunut 18-it sinnerlugit ukiulinnut imaluunniit angajoqqaavinut, taaneqarnerisa tullerinneri malillugit, atuuttussanngortinneqarsinnaapput.”

4. § 63, imm. 2-imi ”§ 60, imm. 2” allanngortinneqarpoq uunga: ”§ 60, imm. 4”.

5. § 63, imm. 3-imi ”§ 60, imm. 1” allanngortinneqarpoq uunga: ”§ 60, imm. 1-4”.

6. *Ilanngussaq 4-imi*, qulequttap ”Uumasuutit” ataani immikkoortoq imatut oqaasertalerneqarpoq:

”Aallaaviatigut qimmiuteqarnissaaq imaluunniit qitsuuteqarnissaaq, kiisalu aalisagaasivimmiittunik aalisagaateqarnissaaq, ineqartinneqartunik timmiaateqarnissaaq, kikkaasunik ineqartinneqartunik aamma saanilunnik assigisaannilluunniit uumasuuteqarnissaaq akuerisaavoq.

Taamaattoq najugaqatigiiffimmi siulersuisut aalajangersinnaapput qimmiuteqarnej qitsuuteqarnerlu taamaakkaluartoq najugaqatigiiffimmi akuerisaassanngitsoq. Qimmiutinut qitsuutinullu immikkut qularnaveeqqusiinissaq attartortitsisup piumasarissavaa. Attartortup kommunimi qimmiuteqarnermut qitsuuteqarnermullu malittarisassiani maleruagassat sukkulluunniit naammassisimassavai. Maleruagassat taakkua naammassineqanngippata, ileqqorissaarnissamut maleruagassat unioqqutinneqarsimasutut isigineqassaaq. Ileqqorissaarnissamut maleruagassat unioqqutinneqarnerannut naammagittaalliuutigineqartut attartortitsisumut ingerlatinneqassapput.”

§ 2

Inatsisartut inatsisaat ulloq 1. januar 2020 atuutilerpoq.

Namminersorlutik Oqartussat, ulloq xx. xxx 2019

Kim Kielsen